

詩

經

剖

疑

詩經剖疑卷之十五

皎皎白駒食我場苗繫之

今朝所謂伊

人於焉逍遙

皎皎潔白也駒馬之未壯者繫絆其足維繫其  
勒如今人留客投轄井中之意伊人指賢者逍  
遙遊息也

皎皎白駒食我場藿繫之維之以永今夕所謂伊  
人於焉嘉客

夕叶祥禽反

藿豆葉也李氏曰豆葉盛於秋可以食馬爲夕

言系一牙 卷十三  
之象猶苗之茂於春爲朝之象永今夕者留一  
夕也朝夕非永於不可留之人而朝夕亦永矣  
嘉客者伊人旣去爲客而不臣也

皎皎白駒賁然來思爾公爾侯逸豫無期慎爾優  
游勉爾遁思

賁卽皎皎之意思語詞爾公爾侯言將重任之  
也任愈重而愈逸豫之無期矣優游逸樂也卽  
遁思之光景曰慎曰勉若羨其德而實冀其復  
來也

皎皎白駒在彼空谷生芻一束其人如玉毋金玉

爾音而有遐心

空谷無人之處寬閒寂寞之鄉也生芻如玉總  
喻其純白之操也金玉借言貴重音音問相聞  
也併音問而重之則有遐心矣遐心者入而不  
返之謂

傳云白駒宴賢也鄒氏以爲饒箕子作蓋箕子  
釋囚而陳範陳範而請罔爲臣僕飄然以去乘  
白駒者殷人尚白故不爲陸亦不改色也

白駒四章章六句

黃鳥黃鳥無集于穀無啄我粟此邦之人不我肯

詩經小雅卷十五

穀言旋言歸復我邦族

黃鳥黃鳥無集于桑無啄我果此邦之人不可與

明言旋言歸復我諸兄

明計謀梁反  
兄升虛王反

黃鳥黃鳥無集于栩無啄我黍此邦之人不可與  
處言旋言歸復我諸父

此流民思歸者之詞三章一意上穀木名從木  
下穀從禾善也無集于穀無居我居也無啄我  
粟無食我食也不我穀言患難不相恤也不可  
與明猶云難與論理也不可與處是難與共處  
也首言邦族次言諸兄次言諸父人情罔蓄愈

極愈益思其親也

黃鳥三章章七句

我行其野蔽芾其樛昏姻之故言就爾居爾不我

畜復我邦家

樛音樛家叶古胡反

我行其野言采其蓫昏姻之故言就爾宿爾不我

畜言歸思復

蓫音逐

我行其野言采其菑不思舊姻求我新特誠不以

畜亦祗以異

菑音福叶筆力反異叶送織反

此與上篇意同樛惡木非可息者蓫皆惡菜非可食者我行其野觸目皆是物也我爲無家

而求昏姻于爾而爾不我畜止則惟有思復舊  
邦而已然誠不以彼之富而厭我之貧亦祇以  
其新而異於故則新之不可爲匹而故之不可  
舍也如此二句似是成語昏姻非指定男女特  
借以相親暱之謂

我行其野三章章六句

秩秩斯干幽幽南山如竹苞矣如松茂矣兄及弟  
矣式相好矣無相猶矣

苞叶補苟反  
茂叶莫口反

秩秩有序干水涯也幽幽深邃苞長也二句以  
起兄弟王者宗支同姓皆曰兄弟也

似續妣祖築室百堵西南其戶爰居爰處爰笑爰  
語戶上聲

築室雖爲子孫實以承先祖曰妣祖者以下文  
有男女而言西南其戶面南山也

約之閣閣桷之橐橐風雨攸除鳥鼠攸去君子攸  
芋除去聲芋音預

古者建室先治垣故以約桷爲言芋葉可蔽風  
雨故譬君子能蔭其身也

如跂斯翼如矢斯棘如鳥斯革如翬斯飛君子攸

璘

音青



此言室之規制華采亦自其外觀之躋者升諸  
高明所以治事也

殖殖其庭有覺其楹噲噲其正噦噦其冥君子攸  
寧

殖殖其庭庶之高也有覺其楹楹之直也噲噲  
其正晝之明也噦噦其冥夜之深也噲噲猶快  
快噦噦猶晦晦也故君子於此休息而安身焉

下莞上簟乃安斯寢乃寢乃興乃占我夢吉夢維

何維熊維羆維虺維蛇

簟叶徒檢徒錦二反寢叶  
于檢于錦二反夢彌登又

莞簟寢具下上施之得宜也寢而夢興而占知

其非溺色也所以爲嗣續妣祖也

大人占之維熊維羆男子之祥維虺維蛇女子之祥

陰陽男女各以其類占之問虺蛇何得爲祥曰  
重在君子之德而不重在物也但以麟族屬陰  
耳

乃生男子載寢之牀載衣之裳載弄之璋其泣嗶  
嗶朱芾斯皇室家君王

裳下服以便提抱璋半圭也圭則太重矣嗶嗶  
聲聞于外也朱芾天子之服皇者燦然鮮光也

室家君王言受室之後而爲君爲王也

乃生女子載寢之地載衣之裼載弄之瓦無非無儀惟酒食是議無父母詒罹

詒音遺

瓦者土所自出卽寢地之物也裼褓也卽用其服而無所加也無非無儀言無一事而不合儀度也事事合儀而惟酒食是議庶幾不詒父母以罪婦道之難也

序云宣王考室也夫帝王之都必依山川以居而川取乎循序而漸進山取乎高大而幽深也且有樹木以相屏蔽友邦以相擁戴於是居之

益安永無所携貳矣乃思嗣續其妣祖之計而  
舉百堵以興作首闢戶以通出入次築室以居  
處次燕寢以笑語也故其周完之嚴密而相承  
若閣閣然用力之整齊而有聲若橐橐然斯風  
雨鳥鼠無自而侵入君子亦可以庇其身矣然  
從其外觀之竦立之如跂也峭拔之如矢也又  
如鳥革而毛羽鮮羣飛而五采備也君子躋之  
以聽政事而謁賓客其在于斯乎且庭之內而  
周正不患于偏倚室之中而噲噲噉噉以順乎  
陰陽君子始可向晦而入宴息矣故畫之正者

其夜常寧寢之安者其夢多吉於是而占熊羆之爲男虺蛇之爲女也蓋熊羆陽屬虺蛇陰屬男而寢之牀者陽宜在上女而寢之地者陰宜在下也衣裳衣褐外內之分也弄璋弄瓦華樸之辨也嗶嗶之聲男子可聞之于外而女則宜自幼而藏之矣朱芾君王男子長成之事也酒食是議女子長成之事也男治國家女主中饋所以致祝之各合其宜也如此其乃所以似續妣祖者乎

斯于九章四章章七句五章章五句

誰謂爾無羊三百維群誰謂爾無牛九十其牝爾  
羊來思其角濺濺爾牛來思其耳濕濕

牝音淳

黃牛黑唇曰牝濺濺和也濕濕潤也

或降于阿或飲于池或寢或訛爾牧來思何蓂何  
筮或負其鰈三十維物爾牲則具

池叶唐何反物叶微律反  
具叶居律反

此指牧牛而言飲池寢訛羊無是事也三十宜  
作三卜言卜其色卜其歲卜其角也三者具斯  
中犧牲而可以祀矣

爾牧來思以薪以蒸以雌以雄爾羊來思矜矜兢

兢不騫不崩麾之以肱畢來既升

雄叶干陵反

此指牧羊而言木粗曰薪細曰蒸乃麾肱之具也雌雄鳥獸之通稱二句謂枚舉而數之也騫過高貌崩過下貌

牧人乃夢衆維魚矣旆維旗矣太人占之衆維魚矣實維豐年旆維旗矣室家臻臻

年叶泥因反

林日正云衆宜作鰥鰥斯之屬以氣化者旱則在陸爲蝗雨則在溝爲魚旱荒而雨熟也旆旗皆旂幟之屬以聚人民但有衆寡大小之不同耳釋名旆兆也旗衆也

序云宣王考牧也夫當厲王之時年歲饑饉家  
室流離牧人之職廢矣安得有牛羊也哉自無  
而有自有而多自多而和則以宣王興復王業  
而牧事成也三百維群舉一群則衆群可知九  
十其犝舉異色則同者可知羊觸以角其角澌  
澌和也牛動以耳濕濕澤也且國之大事曰祀  
而牛則大物也或降飲或寢動任其順適于水  
草之渚而牧人之簑笠餼糧旣以備具亦不須  
迫之使歸矣物得其養孽碩可知始用卜之而  
爲犧牲之資也牛中犧牲而羊亦以備俎豆之



言  
用者觀其矜矜兢兢高下有節應手指麾罔或  
敗群則羊之得所養可知矣不特養之而且教  
之乃爲牧事之成也牲牲肥腍祭祀豐腆神其  
阜之降以豐穰故感諸牧人之夢而應乎太卜  
之占也年歲登室家聚所以始乎成邕而後成  
都也周禮縣鄙建旄州里建旗詩本此意

無羊四章章八句

舊說自汚彼流水而下皆變雅也而此復有考  
室考牧二篇或因錯簡而然乎抑以今日之衰  
而思昔日之盛乎然考牧以上詞氣雍容未入

哀怨俱謂之正雅亦宜而節南山以下則爲變矣

節彼南山維石巖巖赫赫師尹民具爾瞻憂心如惓不敢戲談國旣卒斬何用不監

瞻側衛反與斬全叶

節高峻貌巖巖積石貌赫赫顯盛貌師尹大師尹氏也具俱惓惓也不敢戲談則其正言可知戲談猶史記云談言微中可以解紛也斬絕監戒也

節彼南山有實其猗赫赫師尹不平謂何天方薦瘥喪亂弘多民言無嘉憯莫懲嗟

猗叶於何反  
嗟叶遭奇反

詩經小雅

卷十五

倚草木盛長貌有實猶言實有也謂何者發問之詞薦苻通瘡者病之差也喪亂弘多言天悔禍其如人之多亂何哉所以然者以平日不恤人言故也夫居上者之不可無民猶山之不可無草木也南山實有其草木故猗猗矣尹氏實無其民徒赫赫耳平成也蓋猗猗者成其爲南山而赫赫者不成其爲師尹也

尹氏大師維周之氏秉國之均四方是維天子是毗俾民不迷不弔昊天不宜空我師

氏本弔閔也天文列宿以氐星爲根本卽此所

以然者以太師爲秉國均而上下皆其所倚毗也其奈昊天之不弔而欲蕩我衆師何哉天欲蕩之故令太師非所任而任庶民迷之而不信也不信見下文

弗躬弗親庶民弗信弗問弗仕勿固君子式夷式已無小人殆瑣瑣姻亞則無臚仕

信叶斯人反  
殆叶養里反

弗躬弗親先不信也問詢仕任也皆指君子言弗詢而任之乃所以欺之也式夷式已亦與欺字同意旣以爲式而復已之得無有小人者以間而危之乎兩壻相謂曰亞臚厚也

昊天不備降此鞠誂昊天不惠降此大戾君子如

扁俾民心闕君子如夷惡怒是違

屈叶居例反  
闕叶苦挂反

備均鞠多誂訟戾乖屈至闕息也君子而至則  
民怨方息君子式夷則民怒是違民心之憂樂  
喜怒皆係屬于君子如此而太師欺罔而危殆  
之宜其爲鞠誂而大戾矣非天降之而誰

不弔昊天亂靡有定式月斯生俾民不寧憂心如  
醒誰秉國成不自爲政卒勞百姓

定叶唐丁反

酒病曰醒猶夫亂之方生而靡有定也式月猶  
云不出一月以爲常耳天降亂以爲常故民之

憂而如醉也不自爲政卽弗躬弗親其害卒中  
于民矣

駕彼四牡四牡項領我瞻四方蹙蹙靡所騁音逞

項大也蹙蹙縮小之貌言四牡壯壯而可行四方  
小而莫騁也卽謂天蓋高不敢不局之意

方茂爾惡相爾矛矣旣夷旣憖如相驕矣

矛者仇君子也憖者悅小人也驕之謂何則無  
撫仕之意

昊天不平我王不寧不懲其心覆怨其正

叶諸  
盈反

師尹不平卽昊天不平也昊天不平卽我王

之不寧也不懲其不平之心而反怨其正不平者豈非是非倒置者哉

家父作誦以究王訕式訛爾心以畜萬邦

家氏父字周大夫卽其正之人也究王訕者直窮王所以致訟之繇也訛變也能變易師尹之心則養萬邦不難矣

此詩家父所作刺王用尹氏以致亂傳云栢王伐鄭家父諫之賦節序云刺幽王也

節南山十章六章章八句四章章四句

正月繁霜我心憂傷民之訛言亦孔之將念我獨

今憂心京京哀我小心癘憂以痒

京叶居良反

正月夏之四月正陽之月也不宜霜而霜之繁  
爲此言者其可信乎以爲訛則又恐其將然也  
無其事而有其言因有其應可憂孰甚焉京大  
也所憂愈大則心愈小故曰哀我小心癘憂幽  
憂也正獨憂之意痒病也訛言如繁孤箕服實  
亡周國之謂

父母生我胡俾我癘不自我先不自我後好言自  
口考言自口憂心愈愈是以有悔

後叶下五反  
口叶孔五反

父母生我胡俾我癘卽如浩浩昊天不駿其德



之意瘡病莠醜也愚謂莠爲亂苗之草如小人之亂君子也如此則好字宜作去聲言好惡皆出其口也愈愈益甚貌惟其憂之是以見侮不先不後遇之奇窮也

憂心惓惓念我無祿民之無辜并其臣僕哀我人斯于何從祿瞻烏爰止于誰之屋

惓音繁

惓惓憂貌無祿猶言無可資生之地也臣僕大夫之服役者卽下文屢顧爾僕之僕民自稱也祿者謂逃災禍之困享生人之樂也瞻烏卽何從之意烏止于屋猶民之從祿也

瞻彼中林侯薪侯蒸氏今方殆視天寥寥既克有  
定靡人弗勝有皇上帝依誰云憎

夢叶莫登反

中林林中也侯維也薪蒸見考牧下夢夢不明  
貌皇大也言林中之木粗細尙且有別而天方  
且夢夢何耶既克有定二句天定能勝人也有  
皇上帝二言天不終絕人也

謂山蓋卑爲岡爲陵民之訛言寧莫之懲召彼故  
先訊之占夢具曰予聖誰知烏之雌雄

叶胡陵反

岡陵喻君子之德行言君子雖見棄于王自處  
于卑下而其德行之峻實有難掩者訛言莫懲

言  
譏王之遠賢而庇讒也故老老成人也不問國  
之典故憲章而訊之占夢何耶蓋王亦自恃以  
爲聖也烏之雌雄其誰辨之蓋知人之難如此  
謂天蓋高不敢不局謂地蓋厚不敢不踣維號斯  
言有倫有脊哀今之人胡爲虺蜴

局叶居易反

局曲也踣累足也卽上文蹙蹙靡所騁之意言  
上天下地而莫容也有倫有脊言之常也爲虺  
爲蜴事之變也藏毒于不覺之地猶寓變于常  
之中也

瞻彼阪田有苑其特天之扨我如不我克彼求我

則如不我得執我仇仇亦不我力

阪田側瘠之田也菀茂盛貌特特生之苗也扒動也如不我克者不遺餘力也執近也留也求我則者非能用我也求之惟恐其不得及其就之而以爲好仇則猶然不我力矣

心之憂矣如或結之今茲之正胡爲厲矣燎之方揚寧或滅之赫赫宗周褒姒威之

厲叶力榮反

今茲者幽王之世也正卽篇首之正月厲卽厲氣之結爲繁霜也燎方揚而滅之猶云胸水滅火德也王之信讒棄賢黜褒姒宮中爲主故也

卽二五偶之謂

終其永懷又窘陰雨其車既載乃棄爾輔載輸爾

載將伯助予

叶演汝反

永懷者思其終之無所稅駕也陰雨則懷益窘矣車既載而棄爾輔言國無仁賢將何以共理耶及至墮而呼伯之助則已晚矣

無棄爾輔員于爾輻屢顧爾僕不輸爾載終踰絕

險曾是不意

翻叶筆力反載叶節力反意叶乙力反

員音云周防完美無缺陷傾側之意屢數顧視也僕將車者也過險而顧僕夫者恒情也不以

爲意何耶上呼伯而此顧僕喻國家有事則疾呼賢者而治之事過而不以爲意也

魚在于沼亦匪克樂潛雖伏矣亦孔之炤憂心慘慘念國之爲虐

沼炤俱叶音灼

箋云池魚之所樂非能樂其潛伏于淵又不足以逃匿甚炤炤而易見喻賢者遇難無不思樂退又無所容也國之爲虐率土皆是矣

彼有旨酒又有嘉餼洽比其隣昏姻孔云念我獨兮憂心慙慙

洽比皆合也旨酒嘉餼洽隣比昏何其樂也而

我則惟憂心之慙慙言當是時樂者多而憂者獨也衆人皆醉我獨醒卽此之謂

眇眇彼有屋蔕蔕方有穀民今之無祿天夭是掇

笱矣富人哀此惻獨

眇音此蔕音速  
林音卓笱音可

眇眇蔕蔕小貌屋蔕庇之也穀飲食之也俱指小人言彼方有居有穀其如民之無祿而天生妖孽以掇害之何哉甚矣惻獨無依者之堪閔也

此亦傷讒憂亂之詩序云刺幽王也

正月十三章八章章八句五章章六句

十月之交朔日辛卯日有食之亦孔之醜彼月而微此日而微今此下民亦孔之哀

卯叶莫後反  
哀叶於希反

十月建亥之月交謂日月交會晦朔之間也醜類也言純陰之月陰將敵乎陽也故書傳亦以日月弗集于房爲羲和之失職蓋其重者言耳舍下艷妻之意言褒姒足以掩周王也微虧也彼月則宜有時而虧矣此日不宜虧而今亦虧是亂亡之兆也不亦可哀耶此以虧而喻食語其變也若以常而言之則月有虧而日不宜食也



日月告凶不用其行四國無正不用其良彼月而食則維其常此日而食于何不臧

月食爲常者正以陰魄爲日光所掩而有朔虛是也日則不宜食矣告凶告夫天下以凶亡之徵也行者道與度也不用之者相干犯也猶弗集之意食與微不同上以陰陽本體較之此以陰陽勝負較之臧善也陰陽反背必有不善之事特未知應在何事何人耳

燁燁震電不寧不令百川沸騰山冢崩高岍爲谷深谷爲陵哀今之人胡憯莫懲

惜音慘

震電不寧川沸山崩陵谷變遷皆屬災異然見  
于十月愈不宜矣何者十月雷電收聲而川谷  
靜之時也陵谷變遷尤怪異事今人憊而莫懲  
何耶憊慘也言其雖痛而不知痛也

皇父卿士番維司徒家伯冢宰仲允膳夫聚子內  
史蹶維趣馬耦維帥氏豔妻煽方處

聚音鄒蹶音  
耦音矩

皇父尊其號卿士舉其職也家伯仲允皆字番  
聚蹶耦皆氏司徒冢宰膳夫內史趣馬帥氏皆  
官名然此數者非褒如之煽惑王心則群奸亦  
不能共處于要地矣按周世紀幽王之世西周

三川皆震實在其寵褒如時乎

抑此皇父豈曰不時胡爲我作不卽我謀徹我牆

屋田卒汙萊曰予不戕禮則然矣

萊叶陵之反然叶於姬反

凡國家有興作必三令五申使民知之作而不  
謀卽不時也此言役民非時廢其常業卽下作  
都于向事也曰予非欲害爾民蓋禮如是不得  
不役賤以優貴者耳

皇父孔聖作都于向擇三有事直侯多藏不勌遺  
一老俾守我王擇有車馬以居徂向 二向字平聲  
都城也向在東都之地去鎬京千里而遙皇父

以親寵得封東柳畿內法當二卿今置三事僭  
比列國之諸侯矣侯維藏蓄也多藏益富民以  
賄進爲三卿也愬心不欲而強之之詞俾守我  
王言與王同居于鎬京也上言興役而此欲之  
國故曰擇有車馬以居徂向如此則東遷之意  
起于皇父而不待平王之世矣

黽勉從事不敢告勞無罪無辜讒口囂囂下民之  
孽匪降自天疇沓背憎職競由人

通音敏

黽勉二句言勞苦于事也無罪二句言不免于  
讒也賢人被讒而曰昊天不弔庶民被讒而曰

職競繇人其用意各有在也婉與直之分也

悠悠我里亦孔之痲四方有美我獨居憂民莫不  
逸我獨不敢休天命不徹我不敢傲我友自逸

痲叶扶滿反  
徹叶直質反

痲病也里之痲者國之虐也人之美者已之憂  
也友之逸者已不敢傲而休也其所以然者蓋  
天道之不徹夢夢然也上章雖尤人而卒歸之  
于天也

傳云皇父專政賦十月之交皇父蓋外戚之尊  
者也

十月八章章八句

浩浩昊天不駿其德降喪饑饉斬伐四國旻天疾  
威弗慮弗圖舍彼有罪旣伏其辜若此無罪淪胥  
以鋪

駿大也天之大德曰生今降喪亂饑饉而斬伐  
我四國不駿其德甚矣且其所播之疾威皆出  
于人意慮所不及圖之地而亡論有罪無罪玉  
石俱焚而淪胥以徧柰之何哉

周宗旣滅靡所止戾正大夫離居莫知我勸三事  
大夫莫肯夙夜邦君諸侯莫肯朝夕庶曰式臧覆

出爲惡

勸音異夜叶戈灼反夕叶祥禽反覆音福

周宗鎬京也滅者褒姒滅之也靡所止戾言其  
禍尚未艾也正大夫離居莫肯夙夜言大臣之  
渙散也邦君諸侯莫肯朝夕言列國之叛離也  
末句言善惡之顛倒也

如何昊天辟言不信如彼行邁則靡所臻凡百君  
子各敬爾身胡不相畏不畏于天

信叶斯人反天叶鏡因反

辟言法言臻至也爲陳法度之言而不見信如  
彼迷途而行悵乎不知其所至矣凡百君子謂  
衆在位者敬身謂反離居之身夙夜朝夕以供

職業也相畏亦只是敬字此直以天警戒之  
戒成不退饑成不遂曾我誓御懔懔日瘁凡百君  
子莫肯用訊聽言則答譖言則退

戒成不退者言亂一成而莫之止也饑成不遂  
言歲一荒而百無所遂也會我誓御而不知憂  
瘁乎上二句是古語下則責成誓御之近臣耳  
責近臣者所以儆人君也其如爾衆君子之莫  
肯用訊何哉然而聽其言則答有譖之者則退  
好惡之不常如此烏能見信哉

哀哉不能言匪舌是出維躬是瘁哿矣能言巧言



如流俾躬處休

瘁肥卒反與出字叶

匪舌見由衷之言訥訥然不出諸口是瘁見躬行之勞孜孜然不遺餘力夫曰瘁則與巧有間矣人處于瘁躬處于逸所以爲巧

維曰于仕孔棘且殆云不可使得罪于天子亦云

可使怨及朋友

殆叶養里反友叶羽已反

孔棘且殆卽今之從政殆而也使卽仕也以爲不可仕恐得罪于其君以爲可仕恐得罪于其友進退之難如此仕者願立于王之朝是故不可使而天子罪之旣明且哲以保其身是故可

使而朋友怨之

謂爾遷于王都曰予未有室家鼠思泣血無言不

疾昔爾出居誰從作爾室

家叶古胡反  
血叶虛屈反

遷于王都者去國之謂未有室家者去國之難也鼠思猶言癡憂凡物之多畏惟鼠爲甚孔氏曰人涕必因悲聲而出若血出則不繇聲也今無聲而涕出如血之出故云泣血

此似饑饉之後群臣離散其不去者作詩以責去者傳云王室播遷大臣閔之賦雨其極毛本作雨無正者非按播遷二字亦承作都于向來

說已見上

兩無正七章二章章十句二章章八句三章  
章六句

詩經剖疑卷之十六

閩中後學曹學佺謹撰

小雅

旻天疾威敷于下土謀猶回遹何日斯沮謀臧不從不臧覆用我視謀猶亦孔之邛

適音聿用叶于邛反

敷布猶道回邪適僻沮止邛病也李象先云邛窮也猶云前有所阻後無所歸此言天禍迅烈遍于下矣而王之邪謀終莫之改也

滄滄訛訛亦孔之哀謀之其臧則具是違謀之不臧則具是依我視謀猶伊于胡底

哀叶於希反底叶都黎反

滄滄相和也訛訛相詆也張氏云滄從水從翁  
翁合也益之以水言如以水投水相合無間也  
小人附和如出一口其詆毀人亦復哄然群吠  
朝議如此真可哀也底至也伊于胡底未有所  
定也

我龜既厭不我告猶謀夫孔多是用不集發言盈  
庭誰敢執其咎如匪行邁謀是用不得于道

猶叶于救反集叶疾救反  
咎叶巨反道叶于候反

洪範首謀卜筮固矣然謀貴博故謀及卿士謀  
及庶人而又賁斷故謀及迺心今謀及龜而數

故厭之厭與多俱不能斷之意集成也盈庭是  
兩端之說誰執其咎亦不斷也不斷則不能行  
不行而道之胡得哉

哀哉爲猶匪先民是程匪大猶是經維邇言是聽  
維邇言是爭如彼築室于道謀是用不潰于成

猶卽上文謀字舍先民大猶而不以爲程式惟  
與近小之言是聽是爭則所云孔多而不集盈  
庭而罔執其咎者矣築室道謀幾年不成潰決  
也有沛然莫禦之意不行則不潰矣

國雖靡止或聖或否民雖靡盬或哲或謀或肅或

艾如彼流泉無淪胥以敗

否叶補美反  
敗叶蒲寐反  
謀叶莫徒

靡止無定也靡盬不厚也或聖或否正見其無

定也哲謀肅艾正見其非私厚于我也安可不

廣詢之而但昵于群小如流泉之淪胥以敗乎

謀及小人其敗也宜

不敢暴虎不敢馮河人知其一莫知其他戰戰兢兢

如臨深淵如履薄冰

朱章純用成語以足之也皆是戒慎之詞序云

刺幽王也

小旻六章三章章八句三章章七句

宛彼鳴鵒翰飛戾夫我心憂傷念昔先人明發不寐有懷二人

鳴鵒而戾于夫其飛必有止也以喻人之困苦則呼天疾痛則呼其父母之謂明發不寐有懷二人則我心之憂傷可知

人之齊聖飲酒溫克彼昏不知壹醉日富各敬爾儀天命不又

富叶董力反又疑作又如入字則叶夷篇反

齊肅也聖通明也溫而曰克有定力在內也克勝也富猶甚也一醉日富形容酣酒之人漸及沉湎之意天命國家之大命也又復也言天命



之去人不可復反而昏醉不知者其儀何若矣

中原有菽庶民采之螟蛉有子蜾蠃負之教誨爾

子式穀似之

采叶此體反負叶蒲美反似叶養聖反

中原原中也菽藿也力采者則得之螟蛉桑虫也蜾蠃蒲盧也負持式用穀善也此言人心無常習于善則善習于惡則惡如取諸掇也

題彼脊令載飛載鳴我日斯邁而月斯征夙興夜

寐無忝爾所生

題音第令音零

上章言教子此章以脊令取象于兄弟題視載則也則飛則鳴翼口俱無止息之意邁去征往

也所生父母也言昏醉者必不能及時黽勉而功業廢弛有忝于所生也飲酒之有關於二親如此豈細故哉

交交桑扈率場啄粟哀我填寡宜岸宜獄握粟出

卜自何能穀

扈音戶  
填音顛

交交飛往來貌桑扈竊脂也郭璞云俗呼青雀嘴曲食肉喜偷脂膏無肉而率場啄粟喻好飲酒者貪饗流連之狀然彼之恣欲如此而我顛寡之人倘或效之則岸獄皆所不免矣岸韓詩作犴鄉亭之繫曰犴朝廷曰獄握粟出卜言擇

其善者而從之不宜效彼也

溫溫恭人如集于木惴惴小心如臨于谷戰戰兢兢如履薄冰

末二句自成韻

此借卜者之言以深警之溫溫和柔貌集木恐墜臨谷恐墮也木谷猶可集臨履冰則更無所依薄矣卽上篇末章之意

此大夫傷時之亂交相戒以免禍之詩序云刺幽王也

小宛六章章六句

弁彼鸛斯歸飛提提民莫不穀我獨于罹何辜于

天我罪伊何心之憂矣云如之何

弁音盤  
鸞音豫

李象先云鸞雅鳥也腹下白小而多群雅與鴉同但鴉大而雅小耳又曰純黑反哺者謂之鳥腹白不反哺者謂之鴉宜曰自嘆不能如鳥之反哺終養而反同于鸞也故曰弁彼鸞斯弁者冕之繫以皮爲之繫于頤下而垂條纓者宜曰以鸞自比又以鸞之不能自飛有待弁繫提携者爲比故曰歸飛提提歸飛者反歸而飛于巢也提提者以手提物之貌飛不假于提而曰提提猶云必有人提之而後能歸以終養極言歸

之之難也穀善罹憂也能養則善不養則憂

踧踧周道鞠爲茂草我心憂傷惄焉如擣假寐永

歎維憂用老心之憂矣疢如疾首

老叶魯口反  
疢音趁

踧踧平易也周道周室之通道鞠窮也以周道

而鞠爲茂草如銅駝生荆棘之意何憂如之惄

思也如擣者上下震動卽今所謂怔忡也不脫

衣冠而寐曰假寐事關心則夢中亦長吁故曰

假寐永歎憂愁多者年少而髮白故曰維憂用

老

維桑與梓必恭敬止靡瞻匪父靡依匪母不屬于

毛不離于裏天之生我我辰安在

母叶蒲彼反  
在叶此里反

梓者父之所植以伐琴瑟桑者母之所植以供  
蠶飼故見之而恭敬之心生焉不特桑梓爲然  
凡所瞻仰者卽若父所依倚者卽若母言無所  
徃而非父母也毛外也裏內也言已之于父母  
不屬之外而屬之內也天者不得之父母而呼  
天也辰鄭箋云六物之吉凶歲時日月星辰也  
我辰安在凡人之生莫不有辰而我獨無之謂  
也以父母之不我愛而歸之于天此所以爲誠  
慊之至也

言系牙  
菀彼柳斯鳴蜩嘒嘒有漙者淵萑葦淠淠譬彼舟  
流不知所屆心之憂矣不遑假寐

菀音鬱蜩音條漙千罪反萑音九  
淠音譬屆叶居氣反

菀盛貌漙深貌蜩蟬也嘒嘒聲也萑葦生于水  
旁淠淠多也柳茂則多蟬淵深則多葦言物之  
大者無所不容而王獨不容使漂然如莫繫之  
舟不知其所極也宜乎欲暫假寐以息憂心亦  
不暇矣

鹿斯之奔維足伎伎雉之朝雝尙求其雌譬彼壞  
木疾用無枝心之憂矣寧莫之知

伎音祁  
雝音始

伎伎舒貌留其群也雌雄鳴也此言鹿走而留其群雉鳴而求其雌物莫不有恩于其親者親之不可去猶木之不可無枝也木無枝則爲壞木人無親則爲棄人人宜易之知也我之憂心而反莫知何哉莫之知者言其弗見察也

相彼投兔尚或先之行有苑人尚或瑾之君子秉心維其忍之心之憂矣涕既隕之

先去聲叶蘇晉反瑾音觀

投掩也瑾路冢也君子指幽王蓋投兔者而或先之使覺路死者而或瘞之使歸皆出于不忍也王之待子尚不其然何其忍哉向但心憂今



加之以涕隕矣

君子信讒如或醕之君子不惠不舒究之伐木掎  
矣析薪施矣舍彼有罪予之佗矣

醕音酬叶市殺反掎叶居何反施音侈叶湯何反佗音陟亦叶湯何反

醕旅酬也凡飲酒一獻一酢往而必反至醕酌  
則直受而不反矣不舒究正直受之意掎如犄  
角之犄三方持之恐木顛而本傷也施木之文  
理也隨其文理而析之則迎刃而解皆不妄挫  
折之意佗加也言無罪而妄加之繇于聽讒而  
直受之也其于太子曾伐木析薪之不如矣惟

令彼故罪予

莫高匪山莫浚匪泉君子無易由言耳屬于垣無

遊我梁無發我筍我躬不閱遑恤我後

山叶所解反屬音燭

浚深由用逝往也言山高矣而人猶陟之泉深

矣而人猶入之今王輕用讒言豈謂人莫獲知

之者歟將有屬耳于垣而聽之者矣既以此告

王又恐褒姒伯服之壞其成業乃告之以無敗

梁筍猶谷風之義也故孟子曰小弁之怨親親

也舊說幽王太子宜臼被廢而作此詩

小弁八章章八句

蘓氏曰小旻小宛小弁小  
明四詩皆以小名篇所以

言系牙  
別其爲小雅也其在小雅者謂之小故其在  
大雅者謂之召旻大明獨宛并無之或者其  
有關文未  
可知也

悠悠昊天曰父母且無罪無辜亂如此憮昊天已

威予慎無罪昊天泰憮予慎無辜

且音痘憮音呼  
威叶紆謂反

昊天父母俱拊周王亂如亂命之亂疾威泰憮  
皆亂也憮甚也泰憮則暴威太甚無罪無辜併  
及之矣烏敢不慎

亂之初生僭始既涵亂之又生君子信讒君子如  
怒亂庶遄沮君子如祉亂庶遄已

亂之生也起于讒也讒言之始蓋聽者不察而

涵容之其既復信之此亂之又生矣欲其沮也  
君子怒之欲其已也君子社之怒者涵之反社  
者止之衍也可見止亂係于君子如此君子亦  
指周王

君子屢盟亂是用長君子信盜亂是用暴盜言孔  
甘亂是用餒匪其止共維王之邛此章二句一韻

盟叶謨郎反長上聲叶互良反  
餒音談共音供甲音節

君子于讒始但信之茲乃盟之盟者要諸神明  
而讒人反竊焉所謂信不由衷盟無益也所以  
然者盜言孔甘而王若飲食之矣王若止其貢

諛不使供給則彼之術窮非他人能窮之也王  
其窮之而可乎止共卽承用饑來俱以飲食爲  
譬

奕奕寢廟君子作之秩秩大猷聖人莫之他人有  
心予忖度之躍躍毚兔遇犬獲之

獲叶黃郭反

以寢廟爲言者讒說得行貽禍宗祏也且其不  
畏聖人之言秩秩大猷皆忽之矣此孰非作之  
自君定之自聖者乃爲讒說所亂可不思哉他  
人四句似亦成語毚兔卽喻讒人躍躍狡之甚  
也言彼兔之狡犬尙獲之况他人有心而予不

能忖度之者乎他人不揣指讒人大率謂彼此之心易于忖度雖讒未易售也胡遽墮其術中乎

荏染桑木君子樹之往來行言心焉數之蛇蛇碩言出自口矣巧言如簧顏之厚矣

口叶孔五反  
厚叶胡五反

荏染言木之柔能染色者如讒之甘而能移物也此木非他乃君子樹之矣往來行言甘之狀也柔之實也心焉數之正所謂有心而不能忖度之也蛇蛇如簧皆極狀讒者之態雖顏厚而不恤也不恤也

彼何人斯居河之麋無拳無勇職爲亂階既微且  
燠爾勇伊何爲猶將多爾居徒幾何

麋音眉階叶居奚反燠市勇反  
肝瘍爲微腫足爲燠

拳勇者亂之階也無拳勇而足以階亂用讒故  
也居河之麋處于陰也既微且燠處于弱也此  
皆人所不及防閑之地而其謀猶將且招呼徒  
衆而至可不畏哉傳云大夫傷于讒賦巧言

巧言六章章八句以第五韋巧言  
二字名篇

彼何人斯其心孔艱胡逝我梁不入我門伊誰云

從維暴之云艱叶居銀反  
門叶眉貧反

暴公爲卿士而譖蘓公有友背蘓公而從暴公者蘓公怨之故作此詩以責其友亦所以刺暴公也 彼何人斯指其友而言孔艱言莫測也蓋謂始從而終背之也終背之故從暴公矣從暴故不入蘓公之門矣胡逝我梁卽引無逝我梁之成語也見下文

二人從行誰爲此禍胡逝我梁不入唁我始者不如今云不我可

二人指友與暴公也不我可者今日之言也始者不如今始以爲可也蘓公失友而曰禍曰唁



則其所望于友者深矣

彼何人斯胡逝我陳我聞其聲不見其身不愧于人  
人不畏于天

陳堂塗也堂下至門之徑入室頗近故曰聞其  
聲不見其身也不愧二句非並看云雖不媿于  
人豈不畏于天乎卽人可欺天不可欺之謂

彼何人斯其爲飄風胡不自北胡不自南胡逝我

梁祗攪我心

南叶尼心反  
風叶孚暗反

狀其飄忽之至而使心勞如終風之云也

爾之安行亦不遑舍爾之亟行遑脂爾車壹者之

果云何其肝

安行則宜舍而不我入何也亟行則脂車而逝  
我陳亦非甚急矣反覆究之而不得其情故曰  
一來見我于汝何病哉

爾還而入我心易也還而不入否難知也壹者之  
來俾我祇也

易悅也祇安也否而難知所謂孔艱

伯氏吹壘仲氏吹簫及爾如貫諒不我知出此三

物以詛爾斯

壘音墳簫音池樂器  
土曰壘竹曰簫

壘簫蘓公自喻平音與友之同聲也貫者聲之

和也。蘓公實有心調劑于其間而友諒不之知也。三物犬豕雞也。詛盟也不我知故盟之也。爲鬼爲蜮則不可得有覲面目視人罔極作此好歌以極反側。

鬼蜮變幻之物則不可得而窮矣。人之面目覲然所易見者乃視人以罔極何耶。爾雖罔極予必窮之。然彼不來其言無自而入也。惟有作歌以窮其反側而已矣。反側者始以爲然而終背之也。

何人斯八章章六句

妻兮斐兮成是貝錦彼譖人者亦已大甚

哆兮侈兮成是南箕彼譖人者誰適與謀

叶謔  
悲反

緝緝編編謀欲譖人慎爾言也謂爾不信

編叶批  
實反

捷捷幡幡謀欲譖言豈不爾受既其女遷

幡叶芬  
遠反

驕人好好勞人草草蒼天蒼天視彼驕人矜此勞

人

彼譖人者誰適與謀取彼譖人投畀豺虎豺虎不

食投畀有北有北不受投畀有昊

者叶掌與反  
譖叶滿輔反

楊園之道倚于畝丘寺人孟子作爲此詩凡百君

子敬而聽之

丘叶法奇反

序云巷伯刺幽王也時有遭讒而被宮刑爲巷伯者故作此詩 貝錦喻其文南箕喻其狀姜斐微文貌貝錦則文著矣哆侈微張貌南箕則大張矣故曰彼譖人者亦已太甚又曰誰適與謀喻譖人之言始微而終著始狹而終廣燦乎其有文理若貝之羅織也燁乎其有輝光若箕之簸揚也緝緝二章又將慎之戒之謂不汝信矣不汝受矣何不信而終汝信不受而終汝還則以如箕之張而貝之文也驕人卽譖人者緝緝翩翩捷捷幡幡盡驕態也勞人卽被譖者其

草草然而懷憂心或者蒼天爲能知之惟知之者爲能矜之矣而無柰好好之譖人其謀日益深也吾欲取彼譖人投之豺虎豺虎不食投之有比有比不受雖虎暴之物不毛之地猶然吐之柰之何哉惟有投畀諸昊天俾得制其死命而已此亦無聊之極思而寺人之猥談也彼夫楊園之下地尚可達于畝丘之高豈賤者之言獨不能來君子之敬聽哉惟敬之則貝錦南箕之譖或可免矣

巷伯七章四章章四句一章五句一章八句

一章六句

習習谷風維風及雨將恐將懼維予與女將安將

樂女轉棄予

叶演女反

習習谷風維風及顙將恐將懼寘予于懷將安將

樂棄予如遺

懷叶胡隈反遺叶夷回反

習習谷風維山崔嵬無草不死無木不萎忘我大

德思我小怨

姜叶於回反

蘓氏曰風雨之相須猶朋友之相濟也幽王之

世朋友誼薄窮達相棄故以刺焉恐懼窮也安

樂達也可與共患難不與同安樂此之謂也顙

風之焚輪者風薄相扶而上猶朋友之相將也  
寘于懷爲患難時棄如遺則安樂時矣夫習習  
之風草木之所以生也崔嵬之山草木之所以  
長也然不能使草不死木不萎者天地之功猶  
有所憾柰何忘我大德而獨思我小怨哉

谷風三章章六句

蓼蓼者莪匪莪伊蒿哀哀父母生我劬勞  
蓼蓼者莪匪莪伊蔚哀哀父母生我勞瘁

餅之罄矣維壘之耻鮮民之生不如死之久矣無  
父何怙無母何恃出則銜恤入則靡至

反久叶舉里



父兮生我母兮鞠我拊我畜我長我育我顧我復  
我出入腹我欲報之德昊天罔極

南山烈烈飄風發發民莫不穀我獨何害

音曷

南山律律飄風弗弗民莫不穀我獨不卒

我蠶蒿也莪可食蒿不可食采莪者將以食之  
譬生子者將以賴其養也幽王之世孝子行役  
而遭喪哀其父母生已之勞而養不終如采莪  
者之得蒿也蔚牡蔽也比蒿為甚瘁敝極也比  
勞為甚夫餅小而疊大餅至于罄者疊之耻也  
使民至于窮而無告者亦上之耻也鮮民之生

猶云民之生鮮民不能養猶無生也民之鮮生  
不如死也久矣決之之詞何者無父則無怙也  
無母則無恃也無怙無恃出入銜恤而靡所至  
焉若喪禮所稱孤哀者矣孰知父之生我母之  
養我其拊循而乳哺之長成而覆育之顧視而  
反覆之出入而懷抱之若此其劬勞也所謂欲  
報之德真若昊天而罔極也昊天難報父母其  
可報耶且南山如此其烈烈而高大也律律而  
有文理也以譬父母之尊親而理順也飄風其  
發發然弗弗然予雖欲親就南山之下而不可

得民莫不穀而我獨何害值所遇之窮而養之不終也序云人民勞苦孝子不得終養其父母刺幽王也

蓼莪六章四章章四句二章章八句

有饒簋殽有捭棘七周道如砥其直如矢君子所履小人所視瞻言顧之潛焉出涕

饒音蒙捭音求潛音山

饒滿簋貌捭曲貌棘七以棘爲七所以載鼎肉而升之於俎也砥礪石平也矢直也言必有簋之饒而後有七之載反此則爲餅罄而壘耻矣周道之平直如故也君子之履小人之視亦如

故也其如今昔之不同何哉是以睠言顧之而  
出涕也

小東大東杼柚其空糾糾葛屨可以履霜佻佻公  
子行彼周行既往既來使我心疚

空枯即叶來六  
直叶疚訖力叶

小東大東東方小大之國也此自太行以東韓  
魏燕齊皆是杼持緯者柚受經者葛屨履霜甚  
言其寒薄淒楚之狀佻佻輕跳而飛揚也公子  
諸侯之貴臣周行大路也疾病也言杼軸之皆  
空而征求無藝督促益煩不能爲無米之炊也  
有冽沈泉無浸穫薪契契寤歎哀我憚人薪是穫

薪尚可載也哀我憚人亦可息也

沈音軌契音器載叶節力反

列寒意側出曰沈泉獲艾也契刻也憂苦切心之意憚勞也尚庶幾也載載以歸也息休息也薪已艾而復漬之則腐惟勿浸而獲之尚可載也民已勞而復虐之則病惟勿虐而矜之尚可息也

東人之子職勞不來西人之子粲粲衣服舟人之子熊羆是裘私人之子百僚是試

來音賁叶六魚反服叶蒲北反裘叶渠之反試叶申之反

粲粲衣服出于杼軸自東而輸之西可謂勞矣

未見有以慰勉之也舟人二句言其濫於求私  
人二句言其濫於使蓋有官必有服以彰之有  
求必有予以應之西人日榮則東人之日瘁也  
可知矣

或以其酒不以其漿鞫鞫佩璫不以其長維天有  
漢監亦有光跂彼織女終日七襄

鞫音員  
監平聲

鞫鞫長貌璫瑞也以瑞玉爲佩也漢天河也跂  
隅貌織女星名在漢旁三星跂然如隅也七襄  
箋云駕也駕謂更其肆也蓋天有十二次日月  
所止舍所謂肆也經星一晝一夜左旋一周而

有餘則終日之間自卯至酉當更七次也或者  
疑詞直貫到底屈原天問本出於此酒之不以  
漿璣之不以長皆必無之事也惟人事之必無  
者故于天象而冀其或有荒唐悠謬亦無聊之  
極思乎

雖則七襄不成報章昬彼牽牛不以服箱東有啓  
明西有長庚有採天畢載施之行庚叶古即反

昬星明貌牽牛星名服駕也箱車箱啓明長庚  
皆金星也以其先日而出故謂之啓明以其後  
日而入故謂之長庚天畢畢星也狀如掩兔之

畢行行列也 代醉篇云長庚金星火尅金故  
待日入而始出啓明木星木生火故日未出而  
先見

維南有箕不可以簸揚維北有斗不可以挹酒漿  
維南有箕載翕其舌維北有斗西柄之揭

箕斗二星夏秋之間見於南方云北斗者以在  
箕之北也箕星其踵似箕且有舌斗星其方如  
斗且有柄箕四星二爲踵二爲舌斗七星四爲  
斗三爲柄愚意維天有漢已下皆指京師而言  
謂其府寺之星列皆無實益于人而且恣其箕



歛之欲也

序以爲東國困于從而傷于財譚

大夫作此以告病其大指謂東方之困于供億  
取之地者已竭欲取于天又不可得也故惟仰  
視天漢之光其亦能監視我耶然雖有織女不  
能爲我織而成章雖有牽牛不能爲我駕車而  
輸物雖有啓明長庚不能助日俾我而營作雖  
有天畢不能爲我掩捕乎鳥獸俱惟施之行列  
而已無裨于實用也彼南箕旣不可以簸揚糠  
粃北斗旣不可以挹酌酒漿而箕引其舌反若  
有所吞噬斗西揭其柄反若有所挹取于東是

天非徒無若我何乃亦助西人而見困甚怨之  
之詞也

大東七章章八句

四月維夏六月徂暑先祖匪人胡寧忍予

夏叶後五反  
予叶演女反

六月夏暑方盛曰徂暑者知其時之必至也先  
祖卽周書大誥之前寧人以世有勲勞于王室  
者亦卽宗公之謂忍予謂忍心于予而不之救  
也觀四月維夏則經傳皆用夏正可知倘如周  
正則四月爲春二月非夏令矣

言系  
秋曰淒淒百卉俱腓亂離膜矣奚其適歸

秋至而百卉俱腓陰盛陽微草木遇之而變色也  
瘼與腓皆訓病言遭亂離之病而無所歸往也

冬日烈烈飄風發發民莫不穀我獨何害

音曷

夏則暑秋則病冬則烈言禍亂日進無時而息也  
民莫不穀民指先民蓋先祖之時人也

山有嘉卉侯栗侯梅發爲殘賊莫知其尤

叶于其反

栗之與梅人尙知其爲嘉若忠良者而廢爲殘賊是非倒置甚矣

相彼泉水載清載濁我日構禍曷云能穀

濁叶珠  
玉反

泉水而清濁人所易見也我日禍之構雖有穀

安得而食諸

滔滔江漢南國之紀盡瘁以仕寧莫我有

叶羽  
已反

紀謂經帶包絡之也江漢所以朝宗其爲南國

之紀焉可無矣予盡瘁以仕亦一心于王國也

寧莫我有何哉

匪鶉匪鳶翰飛戾天匪鱸匪鮪潛逃于淵

此言其無所逃于天地之間所以爲王國之綱  
紀也

山有蕨薇隰有杞桋君子作歌維以告哀

叶於希反

此若述其將隱之意以告哀情于有位者食薇  
薇甘杞桋所以求免禍也序謂大夫傷亂刺幽  
王而作

四月八章章四句

陟彼北山言采其杞偕偕士子朝夕從事王事靡

盬憂我父母

子叶獎里反事叶上止反  
母叶滿彼反

偕偕行不止貌從事從王之事也憂我父母猶  
云憂我者父母也

溥天之下莫非王土率土之濱莫非王臣大夫不

均我從事獨賢

賢下叶後五反

不斥王而曰大夫不言獨勞而曰獨賢詩人忠厚之詞賢若所以自譽實諱其爲勞也

四牡彭彭王事傍傍嘉我未老鮮我方將旅力方

剛經營四方

彭叶鋪郎反  
備叶布光反

彭彭然不得息也傍傍然不得已也將壯也旅與齊同經營區畫造作之意非指征伐四方之事也

或燕燕居室或盡瘁事國或息偃在牀或不已于

行

國叶越通反  
行叶戶郎反

詩經小雅

卷十六

燕燕安也息偃謂偃卧也于行徃役也此下皆言役使之不均也

或不知叫號或慘慘劬勞或栖遲偃仰或王事鞅掌

鞅音毫  
栖音西

不知叫號深居安逸不聞人聲也偃仰俯仰也鞅所以控馬而執在手一離掌握則馬奔而不  
可復御矣揔攬國事亦然故曰鞅掌

或湛樂飲酒或慘慘畏咎或出入風議或靡事不

爲

風宜作誣  
議魚鱗州

出入風議謂一出入以風聞議朝事無間其

當否也靡事不爲息肩之無日也舊說大夫困于勞役而作是詩

北山六章三章章六句三章章四句

無將大車祇自塵兮無思百憂祇自底兮

將以大車戎車亦駕六馬之通稱每乘四馬有王事則加塵塵土也謂蒙塵野次也百憂者憂君憂國卽上篇靡事不爲之類疾病也此亦承上篇來

無將大車維塵冥冥無思百憂不出于頤

冥叶莫迫反

冥冥晦暗不明塵之特甚也頤者沉憂之人胸



中若有物而又無可指不出卽沉字之意衛風  
如有隱憂是也

無將大車維塵雖今無思百憂祇自重分

雖重俱上平聲

雖車聲雖鳴之貌召南曷不肅雖王姬之車肅  
言容雖言音此則冥冥其容雖雖其音也自重  
者憂而復憂之詞雖雖是好字眼然不見其容  
但聞其音斯塵冥之甚矣

無將大車三章章四句

明明上天照臨下土我征徂西至于艸野二月初  
吉載離寒暑心之憂矣其毒太甚念彼共人涕零

如雨豈不懷歸畏此罪罟

亢音求野叶上與反

昔我往矣日月方除曷云其還歲聿云莫念我獨

兮我事孔庶心之憂矣憚我不暇念彼共人瞻瞻

懷顧豈不懷歸畏此譴怒

除去聲莫音慕憚叶丁佐反暇叶胡故反

昔我往矣日月方與曷云其還政事愈戚歲聿云

莫采蕭獲菽心之憂矣自貽伊戚念彼共人興言

出宿豈不懷歸畏此反覆

典音郁戚叶子六反

嗟爾君子無恒安處靖共爾位正直是與神之聽

之武穀以女

嗟爾君子無恒安息靖共爾位好是正直神之聽

之介爾景福

叶筆  
力反

初吉朔日也除謂除舊而生新卽二月朔也大  
夫以春仲西征至于歲暮而未得歸故呼天而  
訴之復念其所共之人而出涕焉言其畏罪而  
不敢辭歸也畏罪卽畏此簡書之謂又言昔我  
往自二月初吉之時今未知何時可還而歲已  
暮矣蓋身賤而事勞是以勤勞而罔暇也夫往  
自日月方暖之時至今歲暮而猶不得歸者蓋  
以政事愈煩急焉耳又內咎其不能見幾遠去  
而自遺此憂至于不能安寢而出宿于外也復

戒當事之君子無以安處燕息爲常而泄泄然也當靖共爾位惟正直之人是助好焉則神之聽之而以穀祿之大福與汝矣此吾雖在芄野敢以是規焉芄野猶云在野之草莽也傳云厲王出居于彘賦小明序云小明大夫悔仕于亂世也

小明五章三章章十二句二章章六句

鼓鐘將將淮水湯湯憂心且傷淑人君子懷允不

忘

將音捨  
湯音傷

將將聲也湯湯沸騰貌淑人君子有德者之稱

懷允不忘言表裏之如一也實大者其聲宏矣

鼓鐘喈喈淮水潛潛憂心且悲淑人君子其德不

回喈音皆叶居奚反潛音諧叶賢雞反

喈喈聲之齊也潛潛水流盛貌其德不回無二

三也

鼓鐘伐鼗淮有三洲憂心且妯淑人君子其德不

猶鼗音高叶居尤反

鼗大鼓也三洲淮上地妯動也猶猷通爲也其德不猶無所爲而爲矣

鼓鐘欽欽鼓瑟鼓琴笙磬同音以雅以南以箏不

僭

南叶尼心反  
僭叶七心反

欽欽亦聲也磬樂器以石爲之琴瑟在堂笙磬在下同音言其和雅二雅南二南也篇篇舞僭亂也言三者皆不僭越也箋云雅南舞也南夷之樂曰南卽文王世子胥鼓南是也衆樂俱備所以喻君子之德之和也

蘓氏曰幽王鼓鍾淮上爲流連之樂久而忘反聞者憂傷而思古之君子不能忘也始言湯湯水盛也中言潛潛水流也終言三洲水落而洲見也言其久於淮上也幽王之不德豈其樂非

古歟樂則是而人則非也愚按淮距西京遠甚  
幽王未必親履其地流連而不返者但攷大雅  
宣王平徐夷蓋躬至淮矣卽謂淮人之思宣可  
也彼云王猷允塞此云懷允不忘語相照應且  
南夷之樂亦卽徐夷之服而箏舞也于不僭之  
義益明

鼓鐘四章章五句

詩經剖疑卷之十七

小雅

楚楚者茨言抽其棘自昔何爲我蓺黍稷我黍與  
與我稷翼翼我倉旣盈我庾維億以爲酒食以饗  
以祀以妥以侑以介景福

下六句以三句爲韻  
福叶音璧

力農必言自昔者不忘所自也黍稷蕃盛倉庾  
盈億是承古人治地之績而今日得爲酒食之  
原也與與翼翼相承藉貌以饗祀祭神也以妥  
侑獻尸也以介景福始介而終報之也



濟濟蹌蹌絜爾牛羊以往烝嘗或剝或亨或肆或

將祝祭于祊祀事孔明先祖是皇神保是饗孝孫

有慶報以介福萬壽無疆

通章三句爲韻亨音烹明謨即十饗虛良叶

濟濟蹌蹌有容也絜絜也烝冬祭名嘗秋祭名

剝解剝其皮亨煮熟之也皆治牲之事肆陳之

也將奉持而進之也皆獻牲之事祊廟門內也

孝子不知神之所在使祝博求之于門內也明

備也著也謂儀文蕪備典則昭著也皇美保安

也神保蓋尸之嘉號楚詞所謂靈保也

執爨蹌蹌爲俎孔碩或燔或炙君婦莫莫爲豆孔

所爲賓爲客獻酬交錯禮儀卒度笑語卒獲神保  
是格報以介福萬壽攸酢

起五句爲一韻末三句爲一韻莫音麥叶木各  
反庶叶陟畧反獲叶黃郭反

爨竈也踏踏敬貌俎所以載牲體也燔燔肉炙  
炙肝皆所以從獻也然此爲君婦之事不惟孔  
庶而且莫莫言其物多而敬至也賓客卽助祭  
者獻酬交錯皆指交于神而言惟其賓客故云  
獻酬禮儀容也笑語聲也中度合宜故神保而  
格之或問有賓客在于君婦豈稱別嫌曰俎豆  
燔炙特出婦手非必躬臨祭也

我孔熈矣式禮莫愆工祝致告徂賚羣孫苾苾芬孝  
祀神嗜飲食卜爾百福如幾如式既齊既稷既匡  
既敕永錫爾極時萬時億

熈音善愆叶起巾反  
徂叶須倫反

熈竭也敬之極其至也式禮莫愆言雖極其敬  
質之于禮非繁縟之過也善其事曰工致告謂  
神有是意而祝表之也徂賚猶云以其所致告  
者往而予夫羣孫也卜卽予也幾期也如幾者  
悉如其期願也式法也天下惟法最繁故曰如  
法齊整也言動容周旋整肅齊一也稷疾也無  
怠惰勉強也匡正也不跛踣以祭也敕戒也謂

收歛戒慎也極至善而無以復加也

禮儀既備鐘鼓既戒孝孫徂位工祝致告神具醉  
止皇尸載起鼓鐘送尸神保聿歸諸宰君婦廢徹  
不遲諸父兄弟備言燕私

戒叶訖力反  
告叶古得反

禮儀卽式禮莫愆之儀既備謂事之終盡也既  
盡則鐘鼓俱戒戒者止之義也既止則孝孫復  
其位往阼階下西向之位也致告祝傳尸意告  
利成於主人言孝子之利養成畢也於是神醉  
而尸起鼓鐘而神歸矣曰皇尸者尊稱之也鼓  
鐘者尸出入奏肆夏也鬼神無形言其醉而歸

者誠敬之至如或見之也諸宰庶宰卽獻牲者  
君婦卽獻羞者廢謂神饗之餘皆廢物也徹之  
不遲以疾爲敬不留神惠也祭畢旣歸賓客之  
俎同姓則留與之私燕所以親骨肉也此亦言  
君婦者始而燔炙終而廢徹皆其事也

樂具入奏以綏後祿爾殽旣將莫怨具慶旣醉旣  
飽小大稽首神嗜飲食使君壽考孔惠孔時維其  
盡之子子孫孫勿替引之

奏音族慶叶祛羊反飽  
叶補苟反考叶去九反

樂鐘鼓之屬具謂八音俱備入奏者入內室而  
奏樂以燕也按明堂圖中爲太廟太室太廟致

祭太室燕私後祿者先祭既受祿今燕將復受  
後祿而綏之也莫怨謂情文具備無有怨恫也  
具慶卽莫怨而皆慶也醉飽者神享廟祭復享  
燕祭故云醉飽也小大稽首者廟祭尙嚴故與  
祭之人有限燕祭尙和則無小大而皆稽首也  
神嗜飲食卽醉飽之意壽考卽綏後祿之謂孔  
惠孔時卽留同姓之私燕不稽神惠也勿替引  
之者卽以語私燕之子孫言勿絕而繩引之也  
此詩述公卿有田祿者力于農事以奉其宗廟  
之祭而蘓氏以爲皆人君也其爲成王宣王皆

不可知也

楚茨六章章十二句

信彼南山維禹甸之昀昀原隰曾孫田之我疆我

理南東其畝

甸叶徒隣反昀音勻田叶地因反畝叶蒲彼反

南山終南山也甸治也昀昀者均勻田上之貌

曾孫主祭者之稱田之已成田而可耕也疆者

爲之大界也理者定其溝塗也畝壅也周禮百

畝爲夫夫間有遂十夫爲溝長樂劉氏曰其遂

東入于溝則其畝南矣其遂南入于溝則其畝

東矣

上天同雲雨雪雰雰益之以霡霂既優既渥既霑  
既足生我百穀

雨去聲渥叶  
烏谷反

同雲雲一色也將雪之候如此雰雰雪貌霡霂  
小雨貌優渥霑足皆饒洽之意冬有積雪春而  
益之以小雨潤澤斯饒洽矣

疆場翼翼黍稷彧彧曾孫之穡以爲酒食畀我尸

賓壽考萬年

場音亦彧音郁叶于通反  
年叶泥因反

疆界場畔也翼翼整飭貌彧彧茂盛貌畀我尸  
賓者畀我象神之尸安侑之禮也畀我助祭之  
賓卽郊特牲三獻尸後主人獻賓之禮也



中田有廬疆場有畝是剝是菹獻之皇祖曾孫壽

考受天之祐

此叶攻乎反菹音菹以三句爲一韻

連下三章俱

中田田中也菹酢菜祐福也蓋一井之田其中

百畝爲公田內以二十畝分八家爲廬舍以便

田事于畔上種畝以盡地利畝成剝削淹漬以

爲菹而獻皇祖貴四時之異物順孝子之心也

祭以清酒從以騂牡享于祖考執其鸞刀以啓其

毛取其血膋

考叶去肴反膋音聊叶音勞

清酒清潔之酒鬱鬯之屬騂赤色周所尚也祭

禮先以鬱鬯灌地求神於陰然後迎牲執者主

人親執也鸞刀刀有鈴也膏脂膏也取血以告殺也取膋以升臭也

是烝是享苾苾芬芬祀事孔明先祖是皇報以介福萬壽無疆

享叶虛良反明叶謨郎反

烝進也煇膋升臭皆在此時苾芬者牲牲與黍稷俱馨瓜蒞俱潔也萬壽卽介福也

此詩與楚茨略同言信此南山維禹之所又治原其所自也曾孫因其原隰均勻而田遂疆理之或南東其畝焉各順其地勢之宜也然有地利必資天澤故同雲雨雪益以霖霖而潤漑饒

治此百穀之所繇成也既有地利天時尤藉人力彼疆場整飭而黍稷茂盛者曾孫之穡也爲酒食以獻尸賓故神降之福而以萬年之久也若疆場之中田可以爲廬舍疆場之左右翼可以種瓜果是剝是菹與粢盛酒食俱進之皇祖而獲福焉非特區區黍稷瓜菹之薦以邀神休也當方祭之始旣以清酒灌地求神于陰矣隨迎牲以享祖考焉必親執鸞刀以啓毛示非純色之牲不敢用也又取血以告殺取膋以升臭焉以進而享之祖考而苾芬之氣與黍稷瓜菹

俱升矣祭事備著如此先祖於是美之而降福  
無疆也使非勸其力農以奉祭何以有此哉

南山六章章六句

倬彼甫田歲取十千我取其陳食我農人自古有  
年今適南畝或耘或耔黍稷薿薿攸介攸止烝我  
髦士

畝叶蒲彼反耔叶獎里反  
薿音蟻

倬明甫大也十千謂一成之田地方十里爲田  
九萬畝而以其萬畝爲公田蓋九一之法也我  
食祿主祭之人也陳舊粟也有年豐年也耘除  
草耔壅本也介大烝進髦俊也俊士秀民也古

者士出於農而工商不與焉言農夫而終之以  
髦士所以重農也

以我齊明與我犧羊以社以方我田既臧農夫之  
慶琴瑟擊鼓以御田祖以祈甘雨以介我稷黍以

穀我士女

慶叶見上  
御音迓

齊與粢同曲禮稷曰明粢此言齊明變文以協  
韻耳犧羊純色之羊也社后土方四方也卽夏  
至祭地于方澤之時祭后土四方者所以祈甘  
雨也田祖先嗇也謂始耕田者卽神農也穀養  
也善也言倉廩實而知禮節也

曾孫來止以其婦子饁彼南畝田畯至喜攘其左  
右嘗其旨否禾易長畝終善且有曾孫不怒農夫  
克敏

否叶補美反有叶羽已反  
敏叶母鄙反

曾孫主祭者之通稱來止省耘也饁餉田攘取  
也不曰取而曰攘以貴介而食粗糲必有不取  
獻者故攘而取之見上下相親也易治長竟敏  
疾也此不怒與莫怨同義莫怨卽爲慶不怒卽  
爲喜也

曾孫之稼如茨如梁曾孫之庾如坻如京乃求千  
斯倉乃求萬斯箱黍稷稻粱農夫之慶報以介福

萬壽無疆

坻音池 京叶  
居良反

茨屋蓋言其密比也梁車梁言其穹隆也坻水中之高地京高丘也皆豐熟衆多貌農夫之慶農以收成爲善事也介福萬壽農夫祝報其上  
也

此奉方社田祖之祭言倬彼甫田制甚明瞭歲取十千之入十分取一之良法也取其陳以食農人補不足而助不給也蓋以自古有年故陳陳相因所積如此今適南畝見農夫之耘耔而黍稷茂盛是又將復有年矣故於其所美大止

息之處進我髦士而勞之也蓋雖重士而莫非  
重農矣然有年非他皆方社田祖之錫也故奉  
其粢盛犧牲以祭方社而曰我田之所以善者  
皆賴農夫之福而致之耳又作樂以祭田祖而  
祈甘雨庶有以大稷黍而養其人民也祭畢而  
曾孫因來省耘適與農夫之婦子來饁者偕至  
南畝而田畯分職亦至喜焉曾孫攘其左右之  
饋嘗其旨否之味藹然上下相親矣又見其禾  
之易治竟畝如一而知其終當善而堅實且有  
而衆多是以曾孫悅農夫之勤農夫感曾孫之



愛而益敏焉至于收成之際但見其稼密比寧  
 隆則有茨梁之象其庾層累而上則有坻京之  
 象求倉箱以貯之且以千萬計焉凡此黍稷稻  
 梁農夫皆曰曾孫之貽也而曾孫則曰農夫之  
 慶也曾孫以慶而歸之于下故農夫亦以福而  
 歸之于上如此信乎農事所當重矣

甫田四章章十句

大田多稼既種既戒既備乃事以我覃耜俶載南  
 畝播厥百穀既庭且碩曾孫是若

事叶上止反  
碩叶常約反

大田卽歲取十千之甫田也田大容稼必多故

曰多稼而稼出于種也種之戒者蓄之裕也事  
之備者器之精也覃耜俶載已下語其實也若  
順也曾孫之心以播穀之庭直碩大爲喜也

既方既皐既堅既好不稂不莠去其螟螣及其蠹  
賊無害我田穰田祖有神秉畀炎火

皐 子苟反好叶計苟反  
螣 音特火叶虎委反

方房也謂孚甲始生而未合時也實未堅者曰  
皐好形美好也稂童梁莠似苗皆害苗之草也  
食心曰螟食葉曰螣食根曰蠹食節曰賊皆害  
苗之蟲也

有渰萋萋興雨祁祁雨我公田遂及我私彼有不  
穫穰此有不歛穰彼有遺秉此有滯穗伊寡婦之

利

弘叶息夷反  
穰音齊

渰雲興貌萋萋盛貌祁祁徐貌雲欲盛盛則多  
雨雨欲徐徐則入土公田者方里而井井九百  
畝其中爲公田八家皆私百畝而同養公田也  
穰束秉把也滯亦遺棄之意寡婦不任田事者  
也旣蒙其利則下章饁彼之婦子不言可知矣  
曾孫來止以其婦子饁彼南畝田畯至喜來方禋  
祀以其騂黑與其黍稷以享以祀以介景福

祀叶逸織反  
福叶筆力反

來止曾孫來省歛也饁餉獲也方祭四方之神  
以賽禱也精意以享謂之禋四方各用其方色  
之牲南方用騂北方用黑舉以見其餘也以介  
景福農夫願曾孫之受福與甫田同

此爲農夫之詞以頌美其上若以荅前篇之意  
也言田大而種多故預擇其種使不麗雜戒飭  
其具使不敝鈍於是以利耜始載于南畝以向  
所擇之百穀而播之耕勤而時如此故百穀庭  
直而不拳曲碩大而不低小凡曾孫所欲以充

國用而穀士女者無不於是而順其欲也百穀  
庭碩之後有方阜堅好者此耕耘以時之所致  
也不稂不莠此又擇種之精皆人力之所致而  
害苗之蟲非人力之所爲也故以四蟲無害我  
幼禾望之田祖之神蓋曾孫向嘗御田祖而祭  
之故望其舉而付之炎火之中也然苗害去而  
雨澤又欲及時焉農夫之心先公而後私故望  
此萋祁之雲雨而曰天其雨我公田而遂及我  
之私田乎使收成豐熟彼有不及穫之穉禾此  
有不及歛之穉束彼有遺棄之禾把此有滯漏

之禾穗而不稼不穡之寡婦且得取之以爲利  
焉冀怙君德而蒙其餘惠也農夫賴君之德如  
此將何以報乎故當收穫之際曾孫來省歛與  
農夫婦子之饁獲者同至南畝而田畯亦喜焉  
曾孫又禋祀四方之神以其騂黑之犧牲與其  
黍稷之粢盛以享祀而報乎成物之功神必介  
以景福盛大而無窮矣吁上下之情利賴而相  
報如此非盛德其孰能之

大田四章二章章八句二章章九句

瞻彼洛矣維水泱泱君子至止福祿如茨韎韐有

言系，牙  
與以作六師

起末句而連章俱見者不必拘韻如此瞻洛泱泱是也 韎音昧韜音閣

洛水名在東都會諸侯之處也泱泱深廣貌君子指天子茨積也韎茅蒐所染色也韜韠也合韋爲之周官所謂韋弁兵事之服也與赤貌作猶起也六師六軍也天子六軍

瞻彼洛矣維水泱泱君子至止韠琫有珌君子萬

年保其家室

韠補頂反琫音蚌珌音必

韠容刀之韠今刀鞘也琫上飾珌下飾亦戎服也保其家室者天子以天下爲家也

瞻彼洛矣維水泱泱君子至止福祿旣同君子萬

年保其家邦

叶上  
工反

同猶聚也福祿旣同謂朝會而人心順應之也  
此天子朝會諸侯于東都以講武事而諸侯美  
天子之詩言瞻彼泱泱之洛水萬國朝宗之所  
也而君子至止者鎬京非不可居必駐驂東都  
欲以振德而布武焉耳一朝會而人心效順卽  
天命繇凝福祿不如茨乎且釋華袞而御黻然  
之韎韐起六軍而振厲之矣而又佩容刀之鞞  
有琫琕之飾豈徒自炫耀哉蓋居安思危爲天  
下以保其家室也夫君子以一人而係天下之



心以一身而聚天下之慶此所以福祿既同而  
家邦永保于萬年歟

瞻彼洛矣三章章六句

裳裳者華其葉湑兮我觀之子我心寫兮我心寫  
兮是以有譽處兮

寫叶想  
與反

裳作常謂常棣也湑盛貌之子指諸侯也寫輸  
寫也譽處謂來朝有得君之名永保祿位之安  
也

裳裳者華芸其黃矣我觀之子維其有章矣維其  
有章矣是以有慶矣

慶叶產  
羊反

芸黃盛也章文章也德之積中而發外者也

裳裳者華或黃或白我觀之子乘其四駟乘其四

駟六轡沃若

白叶僕各反

此章言其車馬威儀之盛也

左之左之君子宜之右之右之君子有之維其有

之是以似之

宜音義有叶羽已反似叶養里反

左宜右有言其設施之咸宜也維其有之以德充于內也似之即左之右之肖其所蘊也

此天子美諸侯之詞以荅瞻洛蓋華盛爲可喜之物興君子來同于洛水茲得見之亦可喜也

是以此心傾寫而悅樂之宜其有得君之譽而  
安處矣又華之芸黃而盛燦然有文章者君子  
之盛德發爲文章固宜其有福慶也彼華而或  
黃或白又有可觀之象君子之有車馬威儀亦  
若是也然其才全德備取之左右逢其原是以  
形於外者悉似其中之所有焉豈特文章威儀  
之間哉則我心輸寫而獲譽處之慶誠不虛矣

裳裳者四章章六句

交交桑扈有鶯其羽君子樂胥受天之祜

音戶

交交飛往來貌桑扈竊脂也鶯然有文章也君

子指諸侯胥語詞祐福也此首言其得天

交交桑扈有鶯其領君子樂胥萬邦之屏

丙音

領頸屏蔽也言其能爲小國之藩衛蓋任方伯  
連帥之職者也此言其得人

之屏之翰百辟爲憲不戢不難受福不那

翰叶胡見反辟音壁  
戢音緝難叶乃多反

翰幹也所以當牆兩邊障土者辟君憲法也言  
其所統之諸侯皆以之爲法也戢歛難慎那多  
也

兕觥其觶旨酒思柔彼交匪敖萬福來求

觶音求  
敖去聲

兕觥爵也觥角上曲貌思語詞教傲通交際之間無所傲慢則我無事求福而福反來求我也此天子燕諸侯而致頌禱之詞夫以桑扈之交飛而有文與樂易之君子上交而獲福也奚異然其盛德既足以得天又足以統人故能抑強扶弱治亂持危而爲列國之屏翰也夫然則其功大矣君子尤能歛慎以受福焉使其不戢不難則受福亦豈能多哉惟君子功高而不驕所以膺天子兕觥旨酒之燕亦不恃恩怙寵而傲慢雖無求於福而萬福來求之也宜矣吁頌禱

之中而寓勸戒之意周王之善於燕也如是

桑扈四章章四句

鴛鴦于飛畢之羅之君子萬年福祿宜之

宜音我

畢小網長柄者羅網也君子指天子福祿宜之  
謂順適而安享之也此興得賢之助

鴛鴦在梁戢其左翼君子萬年宜其遐福

叶筆力反

梁魚梁戢斂也戢其左翼以並棲也此興刑于  
之化

乘馬在廐摧之秣之君子萬年福祿艾之

乘去聲摧音對秣叶莫佩反  
艾叶魚肺反

乘馬在廐秣之推之君子萬年福祿綏之

綏叶士  
果反

摧芻秣粟艾養綏安也萬年皆永久之意此興  
安不忘危也

諸侯荅桑扈者言福祿君子所自有而宜遠艾  
綏皆不俟祝矣乃其網羅賢才以佐治也刑于  
后妃以內助也而又耀武振威以不自安逸也  
則皆其致福之因而安養相宜又無俟于祝者  
不祝而祝此諸侯之所以善頌禱也歟

鴛鴦四章章四句

有頍者弁實維何爾酒既旨爾殽既嘉豈伊異

人兄弟匪他薦與女蘿施于松柏未見君子憂心

奕奕既見君子庶幾說懌類音吐嘉叶居何反施音異

頍舉首貌按說文規作頍謂弁形圓如規也匪

他非他人也薦寄生也女蘿兔絲也奕奕憂心

無所薄也君子俱指兄弟為賓者

有頍者弁實維何期爾酒既旨爾殽既時豈伊異

人兄弟具來薦與女蘿施于松上未見君子憂心

恹恹既見君子庶幾有臧來陵之叶上時亮叶恹兵旺叶臧才浪叶

何期猶伊何也時善具俱也恹恹憂盛滿貌臧

善也



有類者弁實維在首爾酒既嘉爾殽既阜豈伊異  
人兄弟甥舅如彼雨雪先集維霰殯喪無日無幾  
相見樂酒今夕君子維宴

霰音線

阜猶多也甥舅謂母姑姊妹妻族也霰雪之始  
疑者霰集則將雪之候以比老至則將殯之徵  
也維宴者自宴之外一切憂慮俱可置之也  
此燕兄弟親戚之詩言今日之燕類然戴弁于  
一堂者非異人也乃兄弟而匪他非疎遠無戚  
葛者也誠若薦蘿之施于松柏固結而不可解  
然所以未見而憂既見而喜也然與燕之兄弟

已俱來而無一人之不在矣真如萬籬之纏綿  
依附于松上向之未見而憂心盛滿若今則既  
見而共慶于嘉美之會庶幾爲之有臧也所以  
內而兄弟外而甥舅不可不乘時以爲樂也如  
天將雨雪則霰先集人之將死則老垂至今之  
死喪無日不能久相見矣則樂酒今夕君子惟  
爲我盡今日之宴可也吁王者篤親親之意可  
謂至矣

頌并三章章十二句

聞關車之牽兮思變季女逝兮匪饑匪渴德音來

括雖無好友式燕且喜

友叶羽  
已反

間關設牽聲牽車軸頭鐵也無事則脫行則設  
之昏禮親迎者乘車嬖美貌言思季女之美而  
往迎之也以諷求友者之冀德音來會而式燕  
以喜也雖無與雖無予之意同

依彼平林有集維鵲辰彼碩女令德來教式燕且

譽好爾無射

鵲音騶教叶居父反  
好去聲射叶都故反

鵲雉辰時射厭也上章但聞其德音此則實見  
其德而稱譽之情見乎詞也倘非諷友則上章  
何以云季女而此突爲碩女乎語意亦不倫矣

雖無旨酒式飲庶幾雖無嘉穀式食庶幾雖無德  
與女式歌且舞

飲謂合飧食謂同牢喻式燕之意

陟彼高岡析其柞薪析其柞薪其葉濟濟兮鮮我覯

爾我心寫兮

析音昨薪叶音襄濟上聲  
寫叶想羽反

柞機木濟盛貌心寫喜譽而歌舞也

高山仰止景行行止四牡騤騤六轡如琴覯爾新

昏以慰我心

仰叶五剛反  
行叶戶郎反

高山大山景行大道也仰止行止以之諷友則

宜而謂諷室家益不顯矣如琴謂六轡調和如

琴瑟也慰我心者遂其饑渴之望燕樂之情也

車牽五章章六句

右已上十篇似非變雅之詩或其錯簡之前  
後也下惟營營青蠅為刺讒者賓筵魚藻采  
菽又皆美之之詞

營營青蠅止于樊豈弟君子無信讒言  
樊音煩叶汾乾反

營營往來飛聲亂人聽也青蠅污穢能變白黑

者樊木名其葉可為紅紫絳色近侍之服以喻

讒止于宦官宮妾也君子指王也

營營青蠅止于棘讒人罔極交亂四國  
叶越逼反

止于棘者繇內侍而及于大臣也爾雅棘木名  
朝位植之左列九棘狄卿大夫位焉群士在其  
後右列九棘公侯伯子男位焉群吏在後是也  
讒之所止益多則其禍中之者愈遠外而東西  
南北之四國皆其所交亂而靡有極者矣

營營青蠅止于榛讒人罔極構我二人

榛婦贇左傳云女贇榛以告虔是也止于榛讒  
又自外而及內矣二人指申后與宜曰也讒止  
于內而后及太子始爲所中矣

按史記褒姒與虢石父比而譖申后太子故宜

曰作此以自怨也青蠅以喻讒人以其所趨甚  
汗終日營營而不知止又爲聲以亂人聽始而  
起于近侍繼而止于大臣終而止于宮闈而后  
及太子皆爲其所構而不能自解免又何窮極  
之有哉此所以戒王以勿聽無交亂乎四國以  
太子爲天下國家根本也

青蠅三章章四句

詩經剖疑卷之十八

閩中後學曹學佺謹撰

小雅

賓之初筵左右秩秩籩豆有楚殽核維旅酒既和  
旨飲酒孔偕鐘鼓既設舉醕逸逸大侯既抗弓矢  
斯張射夫既同獻爾發功發彼有的以祈爾爵

此章兩句爲一韻但首句叶反未詳偕叶舉里  
反設叶書質反抗叶居即反的叶丁藥反

初筵初卽席也左右筵之左右也秩秩有序也  
楚列貌殽豆實核籩實也旅陳也和旨調美也  
偕齊也此未射時之飲也設宿設而又遷于下



也大射樂人宿縣厥明將射乃遷樂于下以避射位是也舉醕舉所奠之醕爵也逸逸往來有序也此將射而飲也侯卽鵠也十尺曰侯四尺曰鵠抗張也大侯張而弓矢亦張節也射夫既同比其耦也獻猶奏也發發矢的質祈求也爵射不中者飲豐上之觶也此既射而飲也要之不出于三爵也

籥舞笙鼓樂既和奏烝衍烈祖以洽百禮百禮既至有壬有林錫爾純嘏子孫其湛其湛曰樂各奏爾能賓載手仇室人入又酌彼康爵以奏爾時

奏叶宗五反禮未詳能叶奴金反仇音拘叶求其反又叶音由怡時叶音甯

籥舞文舞也。烝進衍樂烈業洽合也。百禮言其備也。壬大林盛也。言禮之盛大也。嘏福湛樂也。各奏爾能謂子孫各酌獻尸尸酢而卒爵也。仇讀曰勑室人主婦也。又復也。賓手挹酒室人復酌爲加滿也。康安也。康爵謂爵以安賓之體也。時時祭也。此言因祭而飲之善也。亦不出于三爵也。或問賓手挹酒若有恐溢之意而室人何以復加之耶。曰室人是承上句子孫其湛則賓亦承子孫言似係同族者耳。

賓之初筵溫溫其恭其未醉止威儀反反曰既醉  
止威儀幡幡舍其坐遷屢舞僊僊其未醉止威儀  
抑抑曰既醉止威儀忸忸是曰既醉不知其秩

反叶分適反幡與反叶同  
忸音粥

反反顧禮也幡幡輕數也遷徙屢數也僊僊軒  
舉之狀抑抑慎密也忸忸嫺嫺也秩常也此言  
凡飲酒者常始乎治而卒乎亂也

賓既醉止載號載呶亂我籩豆屢舞僛僛是曰既  
醉不知其郵側弁之俄屢舞僛僛既醉而出並受  
其福醉而不出是謂伐德飲酒孔嘉維其令儀

號音毫動叶于其反倭音婆  
嘉叶居何反儀叶牛何反

號呼嗷謹也傲傲傾側貌郵與尤同過也側俄  
皆傾也倭倭不止也此章極言醉者之狀伐德  
令儀又申言其亂而終誨之也

凡此飲酒或醉或否既立之監或佐之史彼醉不  
臧不醉反耻式勿從謂無俾太怠匪言勿言匪由  
勿語由醉之言俾出童羖三爵不識矧敢多又

否叶補美反怠叶養里反鞿音古  
識叶音失志又叶夷鼓反

監史司正之屬燕禮鄉射恐有懈倦失禮者立  
司正以監之也勿從者不醉反耻之詞太急者

彼醉不臧之態童殺無角之殺羊此不可信之言所謂醉後而言匪言匪由也古者飲酒三爵之外卽不記矣況于多又者乎

序云衛武公刺幽王也按武公行年九十五猶召國人曰毋以老耄而棄予此卽引古義以自懲戒也其先以射祭言者射觀德祀辨賢武公欲造于盛德賢人故寓勉于箴之內云爾且昔之飲酒者舍賓興祭祀而外無所謂飲也惟其以賓興祭祀而飲禮讓有時酬酢有度奚繇而醉哉舍此二者而飲則始未嘗不治而卒乎亂

又醉者之不善反以不醉者爲耻雖出童戎之言亦所不顧矣酒能喪儀敗德若此此武公之深以爲戒也

賓之初筵五章章十四句

魚在在藻有頒其首王在在鎬豈樂飲酒

頒音焚

藻水草也頒大首貌鎬鎬京也豈亦樂也

魚在在藻有莘其尾王在在鎬飲酒樂豈

叶去幾反

莘長也連上章以魚之得所止而遂其性興諸侯之在寓而得所依也頒首莘尾則魚之大者喻天子之詞也以其爲諸侯之長也故曰有頒

有華

魚在在藻依于其蒲王在在鎬有那其居

那安居處也王安其居則天下之諸侯皆安矣此天子燕諸侯而諸侯美天子之詩傳云所以報也

魚藻三章章四句

采菽采菽筐之筥之君子來朝何錫予之雖無予之路車乘馬又何予之玄衮及黼

菽大豆筐筥盛之欲以待賓客也君子指諸侯來朝者卽賓客也路車金路以賜同姓象路以

賜異姓也玄衮玄衣而畫以卷龍也黼如斧形刺之于裳也玄衮惟上公有之黼則五等皆得而有之車馬衣服上以賜其下也未見而先擬物以賜之見其出于中心之誠也

威沸檻泉言采其芹君子來朝言觀其旂其旂淠淠驚聲嚶嚶載駟載駟君子所屆

威音必沸音弗檻胡覽反泉叶才勾反旂叶巨斤反淠音譬屆叶居氣反

威沸泉出貌檻泉正出也淠淠動貌嚶嚶聲也駟駕車之數言駕者既服而三之曰駟四之曰駟也此章言始來朝而喜其至也



赤芾在股邪幅在下彼交匪紓天子所予樂只君

子天子命之樂只君子福祿申之

紓叶上與反  
命叶彌井反

芾所以蔽膝幅邪纏於足所以束脛諸侯來朝  
法服無所不備獨言二者蓋蔽膝以謹拜跪束  
脛以利趨蹌舉此以見其餘耳交交際也紓緩  
也此言趨上惟勤之意是以天子錫之命而申  
之以福祿也

維柞之枝其葉蓬蓬樂只君子殿天子之邦樂只

君子萬福攸同平平左右亦是率從

殿多見反  
邦卜工反

蓬蓬盛貌殿鎮也平平辯治也左右諸侯之臣

也率從言其循諸侯之忠謹也此連下章總承  
匪紆之意而歎美之無已也

汎汎楊舟紼纚維之樂只君子天子葵之樂只君

子福祿脆之優哉游哉亦是戾矣

纚音離脆音琵琶戾時卽之反

紼綷也纚綷也維繫也言以大索纚其舟而繫  
之也舟繫紼臣結主義相似也葵開必向日有  
奉君之象天子以之爲葵取其丹忠也脆厚也  
優游以至於斯正以見其厚耳傳云天子所以  
荅魚藻也

采菽五章章八句

駢駢角弓翩其反矣兄弟昏姻無胥遠矣

反叶分遠反  
達叶於圓反

駢駢和調貌角弓以角飾弓也翩反貌弓之爲物張之則內向而來弛之則外反而去有似兄弟昏姻親踈遠近之意此承上章君臣泰交來而其後如厲幽二王遂不之然也兄弟同姓諸侯也昏姻異姓諸侯也

爾之遠矣民胥然矣爾之教矣民胥倣矣

爾王也上之所爲下必有倣而則之者

此令兄弟綽綽有裕不令兄弟交相爲瘡

祐瘡同音預二

首章兄弟昏姻並言而此單言兄弟者同姓更  
宜親也

民之無良相怨一方受爵不讓至于已斯亡讓如

一方者兄弟不相親也受爵不讓正無良之實  
也王疎兄弟亦必非所親而親者非所親而親  
則其爵不宜受而受矣至于已斯亡猶云至于  
亡斯已也是倒語法

老馬反爲駒不顧其後如食宜餽如酌孔取

駒叶去聲後叶下故食音嗣  
餽音飫取叶音娶

老馬爲駒卽上文受爵不讓也不顧其後卽至

于已斯亡也食宜餽酌孔取比其不知足也飲  
食之人則人賤之卽此意

毋教猱升木如塗塗附君子有微猷小人與屬音  
老馬為駒教猱升木皆成語也猱不教而升木  
塗不強而相附猶夫君子有微美之猷則小人  
自相來屬矣所謂不膠而固無繩約而不可解  
也

雨雪演演見晁曰消莫肯下遺式居婁驕演音標  
婁音慮  
演演盛貌晁日氣也式居語詞言日之所照雨  
雪自消而王心之婁驕則逮下者鮮矣

雨雪浮浮見睨曰流如蠻如髦我是用憂

髦叶莫  
侯反

浮浮雪高積貌流流而去也蠻南蠻髦夷髦言其無禮義而相殘賊也如厲幽當日之政是也序云刺王不親九族而好讒佞使宗族相怨故爲此詩

角弓八章章八句

有苑者柳不尙息焉上帝甚蹈無自暱焉俾子靖之後予極焉

尙庶幾也上帝指王也蹈當作神言威靈可畏也暱近靖安也極求盡其欲也

有苑者柳不尚惕焉上帝甚蹈無自療焉俾子靖  
之後子邁焉

惕音器療叶  
子例反

惕息療病也邁過也求之過其分也

有鳥高飛亦傳于天彼人之心于何其臻曷子靖

之居以凶矜

傳音附天叶  
缺因反

傳臻皆至也彼人斥王也居猶徒然也凶矜遭  
凶禍而可憫也

王者暴虐諸侯不朝而作此詩謂柳之茂盛而  
人欲息之以比王室之尊而分宜朝之也柰何  
王甚威神使人畏之而不敢近者何使已獨朝

之以靖王室則王必責之無已而求盡其所欲  
將何以應之哉夫近王而適足以自病所以畏  
其過分之求而不敢獨朝也是誠何故爲王心  
之無所止耳彼高飛之鳥亦至于天而止乃王  
心無所至極亦獨何哉其貪縱無已如此則豈  
予能靖之乎徒然自取凶矜而已序云刺幽王  
也傳曰厲王不禮諸侯相戒以避之賦菀柳

菀柳三章章六句

彼都人士狐裘黃黃其容不改出言有章行歸于

周萬民所望

叶音亡



都王都也黃黃狐裘之變色者裘色雖變而其容不改也章文章也言忠信也此正見其不改處

彼都人士臺笠緇撮彼君子女綢直如髮我不見兮我心不說

撮叶組稅反  
髮叶方月反

臺夫須也緇撮緇布冠也其制小僅可撮其髻也君子女都人貴家之女也綢直如髮鄭箋謂性情密緻標行正直如髮之本來無隆殺也此皆言其不事粉飾之意

彼都人士充耳琇實彼君子女謂之尹吉我不見

今我心苑結

叶繳  
質反

琇實以美石爲瑱也尹吉鄭氏讀爲尹姑周之  
昏姻舊姓也人見都人之女咸謂尹氏姑氏之  
女言其有禮法也苑結屈積而不得伸也

彼都人士垂帶而厲彼君子女卷髮如蠶我不見  
兮言從之邁

厲叶落蓋反

厲垂帶之貌卷髮鬢傍短髮不可斂者曲上卷  
然以爲飾也蠶螬蟲也尾末健然似髮之曲上  
者邁往也從之邁者設言得見之喜以甚其不  
得見之思也

匪伊垂之帶則有餘匪伊卷之髮則有煥我不見  
兮云何盱矣

煥揚起也盱望也言其帶爲服飾之盛自然下  
垂髮乃生質之美自然上卷無舒肆冶容之態  
也序云古者長民衣服不貳從容有常以齊  
其民則民德歸一傷今之不復見古人也

都人士五章章六句

終朝采綠不盈一掬予髮曲局薄言歸沐

綠草名王芻也兩手曰掬局卷也猶言首如飛  
蓬也王芻易得之物終朝采之而不盈掬意不

在所采也婦人夫不在無容飾故髮如飛蓬夫  
歸則膏沐以致飾

終朝采藍不盈一檐五日爲期六日不檐

檐尺占反叶都甘反  
唐音占叶多甘反

藍染草也衣蔽前謂之檐唐與瞻同五日六日  
借以形容其愆期而不來也

之子于狩言韞其弓之子于釣言綸之繩

狩音獸韞音暢  
弓叶姑弘反

之子謂其君子也張弓曰韞理絲曰綸弋釣男  
子之所有事也若狩則願爲之韞其弓矣若釣

則願爲之理其繩矣

其釣維何維魴及鱣維魴及鱣薄言觀者

魴音房鱣音叔叶音滑  
者叶掌與反

於其釣而有獲也又從而往觀之以見其悅之  
無已也皆設言其歸之之詞傳云周人從軍室  
家念之賦采綠

采綠四章章四句

芄芄黍苗陰雨膏之悠悠南行召伯勞之

芄芄長大貌悠悠遠行之意謂地遠而時久也  
南行者往城謝邑在周之南勞慰撫也推心置

腹甘苦共之也

我任我輦我車我牛我行既集蓋云歸哉

任音壬牛叶  
魚其反蓋音曷

我徒役之衆也任負任者輦人挽車也牛所以  
駕大車也集成也蓋云歸者言方成行而不得  
歸處也與下章意同

我徒我御我師我旅我行既集蓋云歸處

徒步行者御乘車者五百人爲旅五旅爲師春  
秋傳曰君行師從卿行旅從

肅肅謝功召伯營之烈烈征師召伯成之

肅肅周備整齊之意謝邑名申伯所封國也在  
今河南信陽州界功謂城池宮室寢廟門社及  
下章原隰泉流之類是也營之經度董治之方  
也烈烈威武貌征師蕪在道作邑而言成之謂  
撫循激勸以成其功也

原隰既平泉流既清召伯有成王心則寧

土治曰平水治曰清有成疆理之功成也王心  
則寧而役者殊苦矣

宣王封申伯于謝命召穆公徃營城邑故將徒  
役南行而行者作此及後徃戍則有揚水之怨

或亦無召伯以勞之者耶

黍苗五章章四句

隰桑有阿其葉有難既見君子其樂如何

難音那

隰下濕之地宜桑者也阿美貌難盛貌皆枝葉  
條垂之茂樂可知矣言既見君子而其樂如之  
隰桑有阿其葉有沃既見君子云何不樂

沃叶鬱縛反  
光澤貌

隰桑有阿其葉有幽既見君子德音孔膠

幽叶於  
交反

幽深隱貌德音君子之話言也膠固結而不可  
解也



心乎愛矣遐不謂矣中心藏之何日忘之愛叶許  
既反  
上心指君子下心主人自謂也遐之言胡也謂  
猶告也卽好我者示以周行也中心藏之受言  
之益不能忘也傳云燕賓之樂

隰桑四章章四句

白華菅兮白茅束兮之子之遠俾我獨兮

華音花  
菅音姦

序云刺幽后也幽王旣黜申后而立褒姒則申  
后遠矣宮人所以思申后而不見處已于獨也  
白華之菅白茅之束喻申后之表裡純潔且向  
日爲幽王之見寵也

英英白雲露彼菅茅天步艱難之子不猶

茅叶莫侯反

英英輕明之貌白雲而爲露菅茅被之矣此喻王政清明無壅蔽之者則其澤究于下也天運旣已艱難而后復見黜不能以如初是宮闈之內禍亂萌矣安望澤下究哉

漉池北流浸彼稻田嘯歌傷懷念彼碩人

田叶地因反

漉流貌豐鎬之間水多北流嘯歌傷懷所謂長歌之哀過于痛哭者也碩人尊大之稱亦指申后漉池而浸稻田喻申后之能潤澤乎下妻也此俾獨者之所以不堪也

樵彼桑薪印烘于煨維彼碩人實勞我心

印音昂  
煨音忱

桑薪喻申后印指幽王烘燎也煨無釜之灶可

燎而不可烹飪卽今之火鑪也薪之善者宜以

爲爨而反以爲燎以比嫡后之尊反見卑賤也

我心憂矣

鼓鐘于宮聲聞于外念子惓惓視我邁邁

鼓鑼聲聞喻宮庭之事不可掩也惓惓憂貌邁

邁不顧也申后被廢而反言其不顧卽金玉爾

音而有遐心之謂

有鶯在梁有鶴在林維彼碩人實勞我心

梁魚梁也鷺之在梁鴈之在林爲得其所也申  
后被黜爲失其所矣安得不勞我心

鷺鷥在梁戢其左翼之子無良二三其德

戢其左翼有常度也德之二三失其度矣之子  
之德若有二三見棄宜也常度不失而反見棄  
何耶之子反詞也卽指申后

有扁斯石履之卑兮之子之遠俾我疋兮

疋叶喬  
移反

偏音辭卑貌疋病也言石雖卑尙近而可履后  
被黜而遠則不可親矣焉得不疋哉始傷而懷  
既勞而底甚之之詞也

白華八章章四句

縣蠻黃鳥止于丘阿道之云遠我勞如何飲之食  
之教之誨之命彼後車謂之載之

飲食同去聲

縣蠻鳥聲阿曲阿也我勞如何者齟齬困頓口  
不能言也後車副車也

縣蠻黃鳥止于丘隅豈敢憚行畏不能趨飲之食  
之教之誨之命彼後車謂之載之

隅角憚畏趨疾行也

縣蠻黃鳥止于丘側豈敢憚行畏不能極飲之食  
之教之誨之命彼後車謂之載之

側傍極至也

此亦被廢而思有所託者蓋曰縣蠻之黃鳥吾  
見其止于丘阿矣與予相距之甚遠也未見其  
止但見其勞也有飲食之教誨之又命後車以  
載之者乎又言道之遠也而豈敢憚行者哉吾  
有所畏而不能趨以至其所耳必有以飲食教  
誨之後車以載之而後可望丘隅之止也雖感  
慨期望反覆道之而尤必守之以正如此

縣蠻三章章八句

幡幡瓠葉采之亨之君子有酒酌言嘗之

亨叶鋪  
郎反

幡幡瓠葉長貌酌言嘗之謂飲酒而嘗是瓠葉

也

有鬼斯首炮之燔之君子有酒酌言獻之

燔叶汾乾反  
獻叶虛言反

有鬼斯首一鬼也猶數魚以尾也去毛曰炮加  
火曰燔獻之主人獻於賓也

有鬼斯首燔之炙之君子有酒酌言酢之

炙叶陟  
略反

炕火曰炙謂以物貫之而加于火上酢賓酢主  
人也

有鬼斯首燔之炮之君子有酒酌言醕之

炮叶蒲  
侯反

主人又自飲而復飲賓曰醕

此亦燕飲之詩蓋歌工述主人之謙詞言幡幡  
瓠葉采而烹之以爲燕至薄矣然以誠言之雖  
微如瓠葉亦可以達情故君子有酒必以是酌  
而嘗之殖不必于嘉蔬也有兔斯首必熟而與  
賓客共之亦一物之微耳然君子有酒必以是  
獻之而盡酬酢之歡洽燕樂之情殺固不必于  
異饌也庸知一兔之爲薄烙與燔炙之不足以  
告虔耶吁物雖微而其情則無已矣可鑒也已

瓠葉四章章四句

漸漸之石維其高矣山川悠遠維其勞矣武人東



征不遑朝矣

朝叶直高反

漸漸高峻貌山川悠遠者山窮則川斷之川盡則山間之重重相間遠不可極也武人將卒也不遑朝言無朝旦之暇也

漸漸之石維其卒矣山川悠遠曷其沒矣武人東征不遑出矣

卒音萃沒叶莫筆反

卒崔嵬末銳也曷何沒盡也言所登歷何時可盡也不遑出謂但知深入不暇謀出也

有豕白蹢烝涉波矣月離于畢俾滂沱矣武人東

征不遑他矣

蹢音的也音拖

躑躅烝衆也離月所宿也畢星名豕涉波月離  
畢將雨之徵也不遑他者冑雨而不顧也傳云  
周人從征賦漸石

漸漸之石三章章六句

苕之華芸其黃矣心之憂矣維其傷矣

苕音條  
華音花

苕陵苕也亦名陵霄蔓生附于喬木之上其華  
黃萎不能以久存矣民之附于上也猶苕之附  
于木也苕而黃則木之不足附矣

苕之華其葉青青知我如此不如無生

青音精生  
叶桑經反

青青盛貌旣青則似乎可久然我如此又不  
如

無生矣時日曷喪卽此之謂然黃者實狀而青者設詞也

羴羊墳首三星在罍人可以食鮮可以飽

羴音臧罍音柳  
飽叶補苟反

羴羊牝羊也墳大也羊瘠則首大是芻牧之不  
光也非復無羊之盛矣罍笥也笥中無魚而水  
靜但見三星之光是水族之一空也非復魚麗  
之時矣傳云幽王之世戎夷交侵師旅饑饉並  
起百物彫耗詩人覩此而傷悲也

茗之華三章章四句

何草不黃何日不行何人不將經營四方

行叶戶  
郎反

草衰則黃時使然也然一歲之內春生秋殺互  
相爲用未有獨行其衰颯之令而至于無草不  
黃者何人不將而奔馳于四方亦猶是矣  
何草不玄何人不矜哀我征夫獨爲匪民

玄叶胡勾反  
和音輝

玄深赤黑色旣黃而玄也無妻曰鰥言從役過  
時而不得歸失其室家之樂也獨爲匪民者我  
獨非民乎何以使我至此極也

匪兕匪虎率彼曠野哀我征夫朝夕不暇

野叶上與反  
暇叶後五反

虎兕野中之獸也我非虎兕何以日驅之曠野而朝夕不暇者乎

有芄者狐率彼幽草有棧之車行彼周道

芄音蓬狐與車叶  
棧士板反

芄長貌狐在草猶兕在野也棧車役車也周道大道也乘車者與徒步者有間矣言亦之大道而不得休息也

周室將亡征役不息行者苦之而作此詩

何草不黃四章章四句

小雅終